

明
通
鑑
增
編

明通鑑附編卷二上

江西永甯知縣富塗夏燮編輯

附記二上

旃蒙作噩起春正月盡夏五月

大清順治二年

明福王宏光元年

春正月庚寅明以南

京宮殿成推恩加史可法太保馬士英少師王鐸少保

予蔭仍以士英掌文淵閣印充首輔辦事可法力辭太

保許之

攷異南畧釋史俱云加可法太師而明史可法本傳亦云以宮殿成加太師按可法前敘定策

功加少保以太后至加少傳敘江北戰功加少師則此時加大保是其次第也三編推恩目中作加可法太保

今從可法爲督師行不張蓋食不重味夏不箴冬不裘

寢不解衣年四十餘無子其妻欲爲置妾太息曰王事

方殷敢爲兒女計乎在軍中絕飲除夕遣文牒至夜半
倦索酒設肉分給將士已盡乃取鹽豉下之思先帝泣
然淚下凭几卧比明將士集轅門外門不啟左右遙詰
其故知府任民育曰相公此夕卧不易得也命鼓人仍
擊四鼓可法寤怒曰誰犯吾令左右述民育意乃已
癸巳明命黃得功劉良佐率師進屯潁亳皆不行高傑
帥師次歸德遂入睢州 乙未明總兵許定國誘殺興
平伯高傑于睢州初定國嘗上書詆傑爲賊遂交惡定
國駐睢州已遣使納款于我

大清且送其二子渡河爲質乞濟師往援傑微聞之招

定國來會不應復邀巡撫越其杰巡按陳潛夫同往睢
州定國始郊迎毀其軍而以羸見且故爲屈服狀傑心
輕定國遂欲入城其杰止之不聽是日定國置酒享傑
傑飲酣爲定國刻行期且微及送子事定國益疑無離
睢意傑固促之行定國怒夜伏兵傳礮大呼其杰等急
遁走傑醉卧未起衆擁至定國所殺之先是傑以定國
將去睢盡發兵戍開封所留親卒數十人而已定國僞
恭順多選妓侍傑而以二妓偶一卒寢卒盡醉及聞礮
欲起爲二妓所掣不得脫皆死明日傑部將回軍攻城
自東門入老弱無孑遺定國遂走降于

大清軍傑以掠揚州揚民間其死皆相賀然是行也進
取意甚銳時頗有惜之者黃得功聞傑死復引兵襲揚
州將盡殺其妻子以報城中大懼閣部史可法急命同
知曲從直諭解之乃引兵去致異高傑被殺明史係傳
特書是月十一日即乙未
也南畝釋史皆書乙未而計氏書高傑見誘事云十二
日蓋十一之夜十二之辰也小腆紀年書之丁丑今從
明史 辛丑明中旨以吏部左侍郎蔡奔琛兼東閣大學
士預機務阮大鍼援之也尋復以唐世濟爲右都御史

壬寅我

大清兵克西安先是師至潼關聞賊遣僞將劉方亮迎
戰我軍奮擊大敗之自成親率馬步兵至復大破之遂

克潼關僞伯馬世耀以七千人來降斬之進克西安自成已焚宮室由龍駒寨走武岡入襄陽 甲辰明定北都從逆諸臣罪初朝議以六等定讞會尙書解學龍蒞刑部遂定爰書分別上之其一等應磔者吏部員外郎宋企郊舉人牛金星平陽知府張嶙然太僕少卿曹欽程御史李振聲喻上猷山西提學參議黎志陞陝西布政使陸之祺給事中高翔漢潼關道僉事楊王休檢討劉世芳十一人也其二等應斬秋決者刑科給事中光時亨河南提學僉事鞏焞庶吉士周鍾兵部主事方允昌四人也其三等應絞擬贖者翰林院修撰兼戶兵二

科都給事中陳名夏戶科給事中楊枝起廖國遴襄陽知府王承曾天津兵備副使原毓宗庶吉士何孕光少詹事項煜七人也其四等應成擬贖者禮部主事王孫蕙翰林院檢討梁兆陽大理寺正錢位坤總督侍郎侯恂山西副使王秉鑑御史陳羽白裴希度張懋爵禮部郎中劉大鞏吏部員外郎郭萬象給事中申芝芳金汝礪舉人吳達修撰楊廷鑑及黃繼祖十五人也五等應徒擬贖者通政司參議宋學顯諭德方拱乾工部主事繆沅給事中呂兆龍傅振鐸進士吳剛思檢討方以智傅鼎銓庶吉士張家玉及沈元龍十人也六等應杖擬

贖者工部員外郎潘同春禮部員外郎吳泰來主事張
琦行人王于曜行取知縣周壽民進士徐家麟及向列
星李桐八人也其留北俟核定奪者少詹事何瑞徵楊
觀光太僕少卿張若麒副使方大猷戶部侍郎黨崇雅
吏部侍郎熊文舉太僕卿葉初春給事中龔鼎孳戴名
說孫承澤劉昌御史涂必泓張鳴駿司業薛所蘊通政
參議趙京仕編修高爾儼戶部郎中衛周祚及黃紀孫
襄十九人也其另存再議者給事中翁元益郭允庶吉
士魯象吳爾燠史可程王自超白孕謙梁清標楊棲鸞
張元琳呂崇烈李化麟朱積趙頴劉廷琮吏部郎中侯

佐員外郎左懋泰禮部郎中吳之琦兵部員外郎鄒鳴
魁行人許作梅進士吳顯太常博士龔懋熙及王之牧
王臯梅鶚姬琨朱國壽吳嵩孕二十八人也其已奉旨
錄用者兵部尙書張縉彥給事中時敏諭德衛孕文允
文韓四維御史蘇京行取知縣黃國琦施鳳儀兵部郎
中張正聲內閣中書舍人顧大成姜荃林等十人也奏
入諭以周鍾等不當緩決陳名夏等未蔽厥辜宋學顯
潘同春等擬罪未合令再議惟方拱乾名在五等以結
納馬阮特免其罪至是學龍更擬周鍾光時亨等各加
一等潘同春諸臣皆候補小臣受僞無據仍執前律時

馬阮急欲殺周鍾學龍欲緩其死謀之王鐸乘士英注籍上之且請停刑鐸卽擬俞旨褒以詳愼平允士英大怒然事已無及大鉞暨張捷楊維垣等聲言欲劾學龍學龍引疾命未下保國公朱國弼御史張孫振等詆其曲庇行私遂削籍後周鍾光時亨仍同周鑣雷縝祚並論殺大鉞等卽傳旨二等罪斬者謫雲南金齒軍三等罪絞者充廣西邊衛軍四等以下俱爲民永不敘用然學龍所定案亦多漏網而所擬一等諸犯皆隨賊西行實未嘗正刑辟也 辛亥明以監高傑軍衛允文爲兵部侍郎總督開歸軍務傑旣死部下兵將大亂互爲雄

長睢州旁近二百里殺修無遺史可法聞之流涕曰中原不可爲矣速馳至徐州以李本身乃傑甥用爲提督代統其軍立傑子元爵爲世子請卹于朝一軍乃定時黃得功劉澤清劉良佐皆欲并其軍而馬士英忌可法威名于是允文希指疏請可法士英喜卽擢允文總督興平軍以分可法權自是可法益不得展布矣尋又撤傑兵還揚州改命良佐防歸德

改吳南畧系之見月辛亥蓋正月二十七日

燁眉謂定議在下弦之夕者近之今據書之

方明之重頒要典也九江總

督袁繼咸上言人臣之義在後私門而急公讐臣每歎三十年來徒以三案葛藤血戰不已若要典一書已經

先帝焚毀何必復理其說書苟未進宜寢之卽已進宜
毀之至王者代興從古亦多異同平勃迎立漢文不聞
窮治朱虛之過房杜決策秦邸不聞力究魏徵之非固
其君豁達大度亦其大臣公忠善謀翊贊其美請再下
寬大之詔解圜扉疑人之囚斷草野株連之案福王降
旨俞其言羣小皆不喜會定諸鎮兵額汰繼咸軍餉六
萬軍中有怨言繼咸疏爭不得至是以江上兵寡鄭鴻
逵戰艦不還議更造檣九江僉事葉士彥於江流截買
材木士彥家蕪湖與諸商暱封還其檣繼咸以令不行
疏劾士彥士彥同年御史黃耳鼎亦劾繼咸言繼咸有

心腹將校勸左良玉立他宗良玉不從良玉聞之益疑懼上疏明與繼咸無隙耳鼎受人指使而言由是南京藉藉益言繼咸與良玉倡和脅制朝廷矣 四川舉人劉道貞初擊獻賊于雅州賊還據邛州道貞謀復之不克賊執道貞妻王氏脅其夫降大罵一家百口俱死道貞于暎度沒于陣 二月己未明以阮大鍼爲兵部尙書仍兼都察院左副都御史巡閱江防大鍼雖掌中樞置一切兵事不問顧時時撓六部權任劉應賓爲文選司濁亂銓政再舉考選擢其私人二十餘人爲給事御史嘗欲罷撫按糾薦令納金于官糾者免薦者予時九

江督袁繼咸請以陳麟鄧林奇爲總兵大鉞索賄始給
敕印諸白丁練役輸重賂立躋大帥時又有中書舍人
林翹善星術以嘗決馬士英必大用半歲間遂躋授左
都督銜蟒服趨事時人爲之語曰職方賤如狗都督滿
街走 明以工部侍郎高倬爲刑部尙書 丁卯明禮
部尙書顧錫疇罷錫疇以請奪溫體仁謚馬士英惡之
至是嗾張孫振力頌體仁功請復故謚遂勒錫疇致仕
去 戊寅李自成爲

大清兵所追走承天 三月甲申朔明起僞太子之獄
初北都之變闖賊挾太子慈烺西走不知所終或傳其

已遇害是時有自北來稱太子者福王召勲臣朱國弼等閣臣馬士英等翰林劉正宗等入見武英殿面諭府部九卿科道辨驗真僞日午羣臣奏係故駙馬都尉王昺姪孫王之明曾侍衛東宮家破南奔鴻臚少卿高夢箕家丁穆虎教之詐稱太子乃下之中城兵馬司獄越四日復逮夢箕穆虎鞠于午門皆具服亦下刑部獄時都下士民皆以太子爲真衆論藉藉謂士英等朋奸導上滅絕倫理黃得功抗疏爭之疏畧曰東宮未必假冒先帝子卽上子未有了無證明混然雷同者臣恐在廷諸臣諂徇者多抗顏者少卽明白識認亦不敢抗論取

禍矣福王命三法司覆訊王之明等遂令燬得功原疏以絕奸謀又傳諭穆虎若非奸人豈敢挾王之明冒認東宮主使附逆實繁有徒著法司窮治蓋士英意在姜曰廣輩也左良玉亦疏請保全東宮以安臣民之心謂東宮之來實有符驗滿朝諸臣但知逢君不惜大體明知窮究並無別情必欲輾轉誅求遂使陛下忘屋烏之德臣下絕委裘之義普天同怨陛下獨與二三奸臣保守天下無是理也親親而仁民願陛下省之江督袁繼咸亦疏言太子真僞非臣所能懸揣真則望行良玉言僞則不妨從容審處多召東宮舊臣辨識以解中外之

疑湖撫何騰蛟亦力奏北來太子不可殺謂太子到南
何人奏聞何人物色取召至京馬士英何以獨知其偽
既是王昺姪孫何人舉發內官公侯多北來之人何無
一人確認此事關天下萬世是非不可不慎時以主之
明自供甚明命法司將審明節畧各諭之而已 壬辰
明復起王妃童氏之獄初福王爲郡王時娶妃黃氏卒
及爲世子娶妃李氏以洛陽陷遇害童氏者本周府官
人逃難至尉氏縣依王于旅邸生一子已六歲王南奔
各不相顧太妃鄒氏與童氏亦各逃散太妃自河南來
巡按御史陳潛夫奏妃尙在王不召至是妃自言福王

繼妻總兵劉良佐信之巡撫越其杰具儀從送之南都

潛夫至壽州亦稱臣朝謁比入都王以爲假冒下童氏

錦衣衛獄時潛夫已得代將歸馬士英素忌之乃以私

謁竝逮下獄按治良佐上言童氏非假冒而士英亦言

苟非至情所關豈敢自詣宜迎入宮密諭河南撫按護

送皇子來京不聽及童氏入獄中細書相遇月日及睢

州情事甚悉付掌衛馮可宗呈覽弃不視可宗辭審王

改命屈尙忠嚴刑拷掠卒斃之獄中

攷異大悲偽太子童妃三獄野史所

記率多支離傳會之詞今悉不取第參明史潛夫傳及

三編書之然童妃一事似不誤也古今多弃其糟糠之

妻而不顧者何況童氏之遇于旅邸與左傳庾宗婦人

事絕類王即弃之亦何至不令入宮而斃之于獄宜野

史傳疑以爲童妃不僞而福王之僞也人無覺焉妖不自作三案之妖適以速南都之亡而已

明罷

四川巡撫馬乾以太僕少卿耿廷錄代之初龍文光殉難乾時爲川東僉事值川中道阻蜀人共推乾攝巡撫事先是南都以張獻忠亂蜀命廷錄赴雲南監沙定洲軍由建昌入川討賊至是加右僉都御史令撫四川未赴而沙定洲亂作不果行乾攝巡撫行事如故壬寅明以思宗忌日設壇遙祭以獻愍太子定哀王永悼王禘祀是日大學士史可法望祭上書自劾師久無功乙巳我

大清兵取歸德先是大師南下出虎牢關口分兵自龍

門關及南陽三路竝進遂徇河南之鄆城上蔡等縣進克歸德巡按御史凌駟及其從子潤生死之南陽副將李好降河南地悉定 己酉明左良玉舉兵反初良玉與馬士英有隙士英謀築板磯城爲西防良玉歎曰今西何所防殆防我耳及黃澍被逮匿其軍中憤士英甚與諸將日以清君側爲請良玉躊躇弗應會王之明事起良玉爭不聽心甚不平澍欲借此激衆以報已怨召三十六營大將與之盟良玉亦以士英裁其餉益大憾反意遂決乃傳檄遠近以討士英爲名復上疏請誅之畧言臣竊見逆賊馬士英無日不聞其罪狀無人不恨

其奸邪先帝皇太子至京道路洵傳陛下屢發矜慈士英以真爲假必欲置之死而後快其謀臣自此義不與奸賊共天日矣臣已提師在途將士眦目指髮人人必欲快食其肉臣恐百萬之衆發而難收震驚官闕且聲其罪狀正告陛下仰祈剛斷與天下共棄之自先帝之變人人號泣士英利災擅權事事與先帝爲難欽案先帝手定者士英首翻之要典先帝手焚者士英復修之罪不容于死者一也國家提衡文武全恃名器自賊臣竊柄以來賣官鬻爵殆無虛刻都門有職方賤如狗都督滿街走之謠如越其杰以貪罪遣戍不一年而立陞

部堂張孫振以賊污絞犯不數月而夤緣僕少袁洪勲
與張道濬皆詔獄論罪者也借起廢例復原官凡此之
類直以千計罄竹難書罪不容于死者二也閣臣司票
擬政事歸六部至于兵柄尤不得兼握士英已爲首輔
猶復掌樞是弁髦太祖法度且又引其腹心阮大鍼爲
添設尙書各操重柄以爲呼應罪不容于死者三也陞
下選立中宮典禮攸關士英居爲奇貨先擇其尤者以
充下陳罪通于天而又私買妓女寄養阮大鍼家希圖
進選計亂中宮陰謀叵測罪不容于死者四也陛下卽
位之初恭儉神明士英百計誑惑進優童艷女損傷盛

德每對人言惡則歸君罪不容于死者五也國家遭此大難須寬仁慈愛以收人心士英自引用阮大鍼以來睚眦殺人如雷縝祚周鑣等煅鍊周內株連蔓引尤其甚者借題三案深埋陷阱將生平不快意之人一網打盡令天下士民重足解體罪不容于死者六也九重秘密豈臣子所敢言士英遍布私人凡陛下一言一動無不窺視又募死士竄伏皇城詭名禁軍以觀陛下動靜曰廢立由我罪不容于死者七也率土碎心號痛者先帝殉難皇子猶存授受分明臣前疏已悉士英乃與阮大鍼一手拏定不畏天道神明不畏二祖列宗不畏天

下公議不畏萬古綱常忍以先帝已立七年之嗣君爲
四海謳歌訟獄所歸者付之幽囚天昏地慘神人共憤
凡有血氣皆欲寸磔士英大鉞等以謝先帝此非臣之
私言諸將士之言也非獨臣標將士之言天下忠臣義
士愚夫愚婦之公言也伏乞陛下立將士英等肆諸市
朝傳首四方用抒公憤臣等東兵計刻以待不禁大聲
疾呼激切以聞疏上遂引兵而東自漢口達蘄州列舟
三百餘里士英大懼急命阮大鉞劉孔昭率兵會黃得
功趨上江堵禦袁繼咸請赦太子以遏止之不聽王
子我

大清兵下潁州太和明命史可法馳扼徐泗 是春故

明蜀中義師大起先是明督師王應熊總督樊一蘅駐
遵義檄諸郡會師大舉會巡撫馬乾復重慶松潘副將
朱化龍同知詹天顏擊斬賊將王運行復龍安茂州一
蘅乃起舊將甘良臣爲總統副以侯天錫屠龍台參將
楊展游擊馬應試余朝宗所攜潰卒得三萬人至是攻
敘州應試朝宗先登展等繼至斬賊數千級僞都督張
化龍走遂復其城一蘅乃犒師江上初乾復重慶賊將
劉廷舉走求救於獻忠獻忠命養子劉文秀攻重慶水
陸竝進副將曾英與參政劉麟長自遵義至與部將于

大海李占春張天相等夾擊破賊兵數萬英威名大振
諸別將皆屬兵二十餘萬奉一衛節制楊展旣復敘州
賊將馮雙禮來寇每戰輒敗孫可望以大衆援之隔江
持一月糧盡一衛退屯古蘭州展退屯江津賊追截朱
化龍及僉事蔡肱明于羊子嶺化龍率番騎數百衝賊
兵賊驚潰死者滿山谷化龍以軍孤還守舊地他將復
連敗賊于摩泥滴水一衛乃命展應試取嘉定邛眉故
總兵官賈連登及其中軍楊維棟取資簡天錫高明佐
取瀘州占春大海守忠涪其他據城邑奉征調者洪雅
則曹勛及監軍副使范文光松茂則監軍僉事詹天顏

夔萬則譚弘譚詣一衛乃移駐納溪居中調度與督師
應熊會瀘州檄諸路刻期並進獻忠頗懼盡屠境內民
沉金銀江中大焚宮室火連月不滅蓋將奔成都走川
北也

攷異三編統系之去年成都目中因終書其事蜀
碧及諸書分系是年正月明史樊一衛傳亦系之

三月今統系
之是年春下

夏四月丙辰左良玉兵陷九江時李自

成兵敗南下江督袁繼咸命部將郝郊忠陳麟鄧林奇
守九江自統副將汪碩畫李士元等援袁州已登舟聞
良玉反復還九江良玉舟在北岸貽書邀繼咸入舟中
至則語及太子下獄事大哭次日舟移南岸良玉袖出
皇太子密諭叔諸將盟繼咸正色曰先帝舊恩不可忘

今上新恩亦不可負密諭何從來良玉色變乃改檄爲
疏駐軍侯旨繼咸歸集諸將灑泣曰兵諫非正晉陽之
甲春秋惡之可同亂乎遂謀拒守而效忠等已陰納良
玉兵入城縱火殺掠繼咸聞之欲自盡黃澍入署拜泣
曰甯南無異圖公以死激成之大事去矣繼咸因出責
良玉會良玉疾篤夜望城中火光太息曰吾負臨侯臨
侯繼咸字也嘔血數升遂死其子夢庚祕不發喪諸將
推爲帥移舟而東連陷湖口彭澤東流建德等縣南都
戒嚴馬士英等請亟調劉良佐等入衛劉澤清亦以勤
王爲名大掠而東時史可法以

大清兵將及淮南連疏告警且言左兵不過以清君側
爲名未敢爲難若北兵一至則南都不保乃移書士英
趣選將增兵而士英惟以左兵爲急時大理寺卿姚思
孝御史喬可聘成友謙亦請毋撤江北兵亟守淮揚士
英厲聲曰若輩東林猶藉口防江欲縱左逆入犯邪北
兵至尙可議欵左逆至則若輩高官我君臣獨死耳力
排思孝等議淮揚備禦自此益弱左兵之發武昌也
邀明楚督何騰蛟偕行不可良玉則盡殺城中人以刼
之騰蛟解印付家人令速走將自刎良玉部將擁之去
良玉欲與同舟不可乃置之別舟以副將四人守之舟

次漢陽門乘間躍入江中其所守之四人懼誅亦先後赴水死騰蛟旣入江漂流十餘里漁舟救之起則漢前將軍關壯繆侯厠前也家人懷印者亦至相視大驚覓漁舟忽不見時遠近謂騰蛟忠誠獲神祐云左兵陷九江城中將吏皆與之通其守城殉難者有九江監紀同知郭之麟不從左夢庚遇害推官余士偉直入左營大罵號慟死經歷彭永春冠帶焚署率子女六人赴火死都司董四民知城不守先令妻史妾姚竝二子投池死己登城樓射殪數人自刎死世襲指揮僉事徐行可自經死母任妻周子婦陳俱投井殉之里居則故福建通

判傅宏祖德化人致仕歸遇害德化生員李獨明投府學泮池死生員李全昌依母殯不忍去城破入陽明祠縊死妻孫氏投水殉之生員李鴻負母逃遇賊不忍舍鬻白刃死尋陷湖口主簿成啟被執不屈死陷東流知縣程九萬死之而左兵自武昌過蘄水則蘄水教諭鄒孕孝被執罵賊死

攷異以上據殉節錄所載左兵之難者今並增入

己未明

命靖南侯黃得功駐師于銅陵之荻港以扼左軍又以兵部侍郎朱大典爲尙書與阮大鍼巡防上江大典以馬阮進故命之 庚申明誅北都降官光時亨周鍾武懷竝賜周鍾雷縑祔死鍾與時亨等旣以從逆加等而

鑑遂從坐阮大鍼尤憾鑑必欲殺之于是御史羅萬爵
王機等連疏詆鑑及續祚至比續祚爲成濟請亟正西
市曾左良玉稱兵人情洶洶而良玉檄中復斥其構陷
鑣續祚狀士英等益怒因謂鑑實召良玉兵遂賜二人
自盡故事小臣無賜死者因良玉兵東下故馬阮輩亟
殺之 辛酉我

大清兵自歸德分道南下明總兵李成棟遁遂入徐州
壬戌明黃得功敗左軍前鋒于銅陵之灰河明日復
沈其舟三十艘南都報捷命賜諸將銀幣 乙丑左夢
庚陷安慶巡撫張亮被執後挾之北行乘間赴水死參

明通鑑外紀卷二
將孟振邦及同知王治心皆不屈死懷甯胡士恂遇害
二子再寅紹虞俱悲憤不食死尋破銅陵知縣胡鯤化
典史胡國瑄訓導張緯俱死之 丙寅

大清兵克泗州未至泗州二十里遣將先奪泗北淮河
橋守將焚橋遁我兵遂乘夜渡淮先是閩部史可法移
軍駐泗州護祖陵將行左良玉稱兵犯闕召可法入援
渡江抵燕子磯明兵已敗良玉軍可法乃趨天長檄諸
將救盱眙俄報盱眙已降于

大清泗州援將侯方巖全軍敗沒可法一日夜奔還揚
州俄傳許定國兵將至殲高氏部曲城中人悉斬闕出

舟楫一空可法檄各鎮兵無一至者而總兵劉澤清已自淮安納款于

大清 己巳明暴左良玉罪狀是日左夢庚軍至池州良王之舊將惠登相者本降寇所稱過天星者也時爲後營總兵感良玉恩有忠實心夢庚自九江東下連陷郡縣獨池州不破貽書登相言留待後軍登相大詬曰若此則反不如我前爲流賊時矣如先帥末命何撤其軍返夢庚索輕舸追之相見大慟登相以夢庚不足事遂引兵絕江去左軍諸將乃議還師而

大清兵已至江北踰月黃得功復大破左軍于板子磯

夢庚遂謀納欵于我

大清 辛未

大清兵至揚州先是豫親王率師至揚州城北獲船百餘艘是日

大兵距揚州城二十里列營又至揚州城南獲船二百餘艘遂薄揚州城下 丁丑我

大清兵克揚州明督師兵部尙書大學士史可法等死之可法駐揚州檄諸鎮兵不至惟總兵官劉肇基自白洋河趨赴請背城一戰可法持重不許先是

大清兵屯班竹園招諭可法及衛允文等降不從總兵

李棲鳳監軍副使高岐鳳拔營出降城中勢益單諸文武分陴拒守舊城西門險要可法自守之作書寄母妻且曰死葬我高皇帝陵側及我

大清兵薄城下用巨礮擊城西北隅城遂破可法自刎不殊一參將擁可法出小東門旣就執可法大呼曰我史督師也遂遇害肇基分守北門發礮傷圍者及城破率所部四百人巷戰格殺數百人後騎來益衆力不支與副將乙邦才馬應魁莊子固等皆戰沒揚州知府任民育緋衣端坐堂上遂見殺合家男婦盡赴井死同知曲從直與其子死東門同知王纘爵工部尙書佐孫也

亦死之江都知縣周志長以遭高傑將士窘辱求解職

以羅伏龍代之受代甫三日兩人俱死兩淮鹽運使楊

振熙監餉知縣吳道正江都縣丞王志端賞功副將汪

思誠皆殉城死

攷思誠史又有監餉僉事黃鉉鉉一作鉉小腆紀年所載有訓導李自明增謙

之端野史作端

衛允文亦赴水死其以戰死者又有副總兵樓

挺汪應龍

明史劉肇基傳作江雲龍今據三編

李豫參將陶國祚許謹馮

國用陳光玉李隆徐純仁遊擊李大忠孫開忠都司姚

懷龍解學會等八十餘人其以參軍事從死者有遵義

知府何剛初剛以給事中陳子龍薦治水師擢員外郎

其兵隸可法可法大喜得剛剛亦自喜遇可法知己而

馬士英惡之出剛守遵義可法垂涕曰子去吾誰仗剛
亦泣願死生無相背踰月揚州被圍佐可法拒守城破
投井死庶吉士吳爾璥陷北都賊中賊敗南還謁可法
請從軍贖罪可法遂留參軍事其父之屏方督學福建
爾璥斷一指畀故人祝淵曰君歸語我父母悉出私財
畀我餉軍我它日不歸以指葬可也從高傑北征至睢
州傑被難爾璥流寓祥符遇一婦人自言福王妃爾璥
因守臣附疏以進詔斥其妄言逮之可法爲救免從守
揚州新城城破投井死幕客死者有盧渭長洲諸生可
法出鎮淮揚渭率諸生伏闕上書有秦檜在內李綱在

外語可法才渭留居禮賢館渭方歲貢當得官不受職

而擬授崑山歸昭等二十餘人爲通判推官知縣甫二

旬城陷渭監守鈔關投于河昭死西門從死者十七人

按黑据釋史所載又有書記顧起龍龔之厚陸曉唐經

出連虛渭歸昭共幕客十九人其佚去姓名者十三人

明史可法傳言十七人者蓋除渭昭二人數之也又按

南九文吳爾壩皆以甲申陷賊者改殉節錄皆不予諡

里居之殉節者有故兵部侍郎張伯鯨揚州被圍與當

事分城守城破自經死妻韓子婦郝俱從殉

及異南畧伯鯨標下游擊龔臣被執不屈死諸生高孝纘王士琇王纘王纘王纘等又

有武生戴之藩醫者陳天拔畫士陸愉義兵張有德市

民馮應昌舟子徐某及婦女死節者不可勝紀

攷異以上揚州

殉節皆據明史史可法劉肇基傳三編增入衛允文蓋
允文以增馬阮故溫氏釋史刪之殉節錄亦無其名今
依三編列之官吏下若殉節錄所載又有故浙江知縣
韓鼎新指揮馬一麟俱江都人並城陷死江都生員末
祥遠韓默然與妻蕭子起及祥遠之妻皆從死又生
員汪應坤張映發劉慶遠金鳳呂家齊饒餘汪自盤監
生王廷珮俱丹陽人揚州破俱死之又布衣許德溥如
阜人聞揚州陷刺其臂曰生爲明臣死爲明鬼後事發
見殺妻朱氏亦死之又釋史所載史可法之家人史
書從死之今所載悉據明史三編而增識其不見者可
法死覓其遺骸天暑蒸變不可識踰年家人以袍笏招
魂葬于揚州之梅花嶺可法無子遺命以副將史德威
爲之後我

大清豫王命特釋德威俾世祀可法給粟帛恤其家時
有傳可法不死踰年四方弄兵者多假其名號以行後

有奉命手刃可法者爲證其事蓋卽在破城之日也

或異

野史所載或曰公如姚平仲故事跨白驃去或曰縋城走自沈諸江而溫氏釋史謂被執至大營留三日不屈殺之實則公之死後詢之史德威及萬季野所記安珠護事皆云公卽以城破之日被執見殺而公之幕下應廷吉以護餉出得免其所撰青麟屑以爲可法之弟可某升手刃者尤得其實今仍系之是日下程以庶吉士陷賊中賊敗南歸可法請置之理福王以可法故令養母遂居南京後流寓宜興閱四十年而卒

五月丙戌我

大清兵臨江明總兵鄭鴻逵鄭彩以水師守瓜洲副使楊文驄駐金山扼大江而守會南都擢文驄巡撫常鎮兼督沿海諸軍文驄乃還駐京口合鴻逵兵南岸與

大清兵隔江相持我軍編大筏置燈火夜放之中流南岸軍發礮石以爲獲勝也日奏捷已丑夜我軍乘霧潛濟陸續引渡又留舟師于北岸敵至則以礮夾攻之及迫南岸明諸軍始知倉皇列陣甘露寺鐵騎蹴之悉潰蘇松巡撫霍達及文聰俱走蘇州鴻達等縱兵大掠遁還閩中

〔改異〕丙戌是月初五日也己丑初八日也明史楊文聰傳書初九日者蓋初八之夜初九之朝也凡四五兩月月日皆參野史及東華錄所載譚王原

奏而丙戌臨江已丑渡江三編皆據世祖實錄今

遺書 辛卯明福王由崧出奔太平時京口敗軍奔還

南京大震王猶酣宴至夜半騎馬自通濟門出走蓋欲

倚黃得功也劉孔昭斬關遁 壬辰明馬士英以黔兵

四百人爲衛挾福王母妃走浙江亂兵入獄擁王之明
立爲太子百官多逃者 癸巳明福王至蕪湖時靖南
侯黃得功聞京口之變方收兵屯蕪湖王潛入其營得
功驚泣曰陛下死守京城臣等猶可盡力奈何聽奸人
言倉卒至此且臣方出戰安能扈駕王曰非卿無可仗
者得功泣曰願効死 乙未

大清兵自丹陽趨句容前隊駐郊壇門丙申豫親王入
南京營于城北明總督京營忻城伯趙之龍奉表納款
勲戚則魏國公徐州爵駙馬齊贊元靈壁侯湯國祚安
遠侯柳祚昌等大臣自大學士王鐸禮部尙書錢謙益

等文武數百員竝城內官民迎降興平伯高傑子元照
廣昌伯劉良佐等亦于沿途歸附凡收兵得馬步二十
三萬八千三百遂定江南 癸卯豫親王遣兵及降將
劉良佐等襲太平時明福王已走蕪湖聞

大軍至登舟欲渡江我軍據京口截其去路靖南侯黃
得功以戰荻港時傷臂衣葛衣以帛絡臂佩刀坐小舟
方督麾下八總兵結束前迎戰而良佐大呼岸上招降
得功怒叱曰汝乃降乎忽飛矢至中其喉左偏得功知
不可爲擲刀拾所拔箭刺吭死其妻亦自經死總兵翁
之琪投于江得功粗猛不識文義南中初立王詔書多

出羣小得功得詔紙或對使罵裂之然忠義發天性不
阿權要每戰飲酒數斗酒酣氣益厲喜持鐵鞭戰鞭漬
血沾手腕以水濡之久乃得脫軍中號曰黃闖子始爲
偏裨隨大帥立功名及專鎮封侯不及一年餘而南北
轉徙主逃將潰卒至束手坐斃與國俱亡論者謂大命
將傾良將顛蹶得功蓋終之云 丙午執明福王至南
京黃得功旣死劉良佐縱兵劫營得功麾下左協總兵
田雄右協馬得功等挾王出降雄遂入王舟負王以獻
致異自己丑 大清兵渡江以後月日俱散見明史
本傳中而福王及馬士英之出奔及入蕪湖被執明史
本傳特書干支曰辛卯王走太平則初十日也王辰土
英挾福王母奔杭州則十一日也癸巳王至蕪湖十二

日也丙申

大兵至南京十五日也丙午執王至南

京二十五日也證之諸書大畧相同而阮大鍼傳言五

月三日王走太平楊文驄傳言十三日

大

是月

清兵破南京皆轉寫有誤字也今據福王本傳

是月

南都之陷文武百官率多迎降大臣惟刑部尙書高倬

投繯死而逆案起用之張捷楊維垣亦死焉或曰南都

方亂擁立王之明以王鐸斥其爲僞而歐之捷懼禍及

遂至雞鳴寺以佛幡自縊也維垣偕其妾朱氏孔氏並

自縊死或曰二妾先死維垣置三棺中題楊某之柩而

寢其下夜遁至秣陵關爲怨家所殺也其庶僚之殉難

者則有儀制司主事黃端伯迎降不出捕繫之閔四月

諭之降不從卒就戮

攷異三編載行人陸培殉難于南都蓋三編所記至順治二年五月

止故類記之若輯覽則系之二年六月諱之明史

戶部

陳潛夫傳言培以潞王降自縊死今改入六月

郎中劉成治南都破趙之龍將降封戶部府庫成治憤

手搏之之龍跳而免成治歸寓遂自經戶部主事吳嘉

允奉使出都聞變還謁方孝孺祠投繯死一僕亦自殺

中書舍人龔廷祥馬世奇門人也城破衣冠步至武定

橋投水死時又有欽天監博士陳于階國子生吳可箕

武舉黃金璽布衣陳士達並死焉一時聞南都之難而

死者長洲生員文乘故大學士震孟子也

致異南都人絕粒死並見

列節錄

與震孟之弟震亨並以世臣殉國難死焉其以諸

生死者又有六合馬純仁邳州王台輔爲尤著六合歸

附純仁題名橋柱抱石自沈于河台輔當南都立劉澤
清等張樂大宴于睢甯台輔衰經直入責之曰國破君
亡此公等臥薪嘗膽食不下咽時顧置酒大會邪左右
欲鞭之御史王燮曰此狂生也命引去至是聞南京陷
視其廩曰此吾所樹盡此死明年粟盡北面再拜自縊
死及異以上皆見明史而南畧諸書所載又有中書陳
璘及子舉人伯俞光祿卿葛徵奇戶部郎中劉光弼
禮部郎中劉萬春及孝陵衛參將杜學伸等又有投秦
淮河中之馮小瑞百川橋下之乞兒皆同時殉南都之
難者茲時有石樓寺僧者歛台輔畢亦死于尸旁

大清兵執明福王至南京乃改南直隸爲布政司以應
天府爲江甯府郡縣無不歸附江南悉定于是豫親王

明通鑑均編卷十二上

三

遣貝勒博洛等統兵趨浙江並分徇常州蘇州諸郡縣

明通鑑附編卷二下

江西永甯知縣當塗夏燮編輯

附記二下

旃蒙作噩起夏六月盡冬十二月

大清順治二年夏六月甲子

攷異據甲乙紀在是月甲子又云十三日甲子正六

月十三日也今據之

大清兵克杭州時故明潞王常淂徙居于杭明故臣聞福王見執請王監國不許不數日

大兵至王從巡撫張秉貞及陳洪範等計率衆開門迎降時監司及郡邑長吏多遁竄惟錢塘知縣顧咸建故大學士鼎臣曾孫也守官不去潞王降咸建獨不至尋

被執死之臨安知縣唐自綵與從子階豫逃山中有言其受魯王敕陰部署爲變遂被執自綵磨階豫走不從遂同死鄉官則錢塘陸培以行人奉使事竣歸省聞南京旣覆路王又降以繩授二僕從容就縊死王道焜以崇禎末授邵武同知方待命而都城陷微服南還會杭州失守遂投繯死

攻異據殉節錄所載有臨安訓導過俊民繼死功臣山又有仁和諸生方

天爵衣冠自到死諸復

是月

大清分兵取江西降將金聲桓左軍部將也左夢庚降于九江三十六營諸將皆從之北去聲桓不欲行請取江西自効豫親王命闖賊降將王體忠與合營屯九江

規進取聲桓遣牌招撫江西巡撫曠昭弃城走聲桓遂入南昌南康九江郡縣皆望風下德化李含初傾家起兵謀復德安瑞昌不克死之乃遣部將分徇撫建等郡明馬士英之奔浙江也道經廣德州知州趙景和閉戶拒守士英攻破執景和殺之大掠而去至杭州守臣以總兵府爲福王母妃行宮未幾阮大鍼亦自上江逃至及

大兵下杭州士英聞魯王監國遂與大鍼走浙東

大清兵之東也分兵徇西平明河南勸農總兵官劉洪起軍于新息光固之間力不支中流矢死同時有故明

游擊朱賢亦以分防徐邳死之

以戰死明史及殉節錄

皆不著年月綏寇紀畧補遺系之是年六月蓋亦大兵克南都之前後事也朱賢之死亦据殉節錄彙書之

閏月辛巳朔

大清兵徇江陰明典史閻應元陳明遇等拒守不下時南京亡列城皆下江陰諸生許用倡言守城遠近應者數萬人明遇初主兵事戰不利而應元前任典史平海賊有功遷英德主簿道阻未赴寓居江陰衆推爲知兵明遇乃請之入城屬以兵事凡拒守者兩月餘丁亥故明唐王聿鍵監國于福州王徙居廣西未行南都破次杭州遇總兵鄭鴻逵戶部主事蘇觀生奉之入閩總

兵鄭芝龍巡撫都御史張肯堂與故禮部尙書黃道周等定議奉王監國肯堂華亭人己丑明餘姚在籍前九江僉事孫嘉績吏科都給事中熊汝霖起兵拒守壬辰明鄞縣在籍刑部員外郎錢肅樂起兵拒守嘉績忠烈公燧五世孫也先是汝霖聞

大兵將至杭奔告潞王欲發羅木營兵拒之而王已定計迎降不聽汝霖歸見都御史劉宗周而泣宗周嘆曰吾已絕粒待死諸君倘有能爲田單卽墨之守者天下事未可知也顧悠悠之輩其誰足語者子其勉之汝霖歸而謀于嘉績遂以書告鄞于是鄞之貢生董志甯等

推肅樂爲主而是時故督餉僉都御史張國維亦起兵于東陽故明魯王以海方居台州國維謁請監國而嘉績肅樂亦遣鄞舉人張煌言奉箋勸進于是魯王遂自台州至紹興用故大學士方逢年議稱魯監國

致異輯覽系魯

王監國于六月因唐王彙記也諸書亦多系之六月而證之明史張國維傳國維朝王于台州在閏六月結埼亭孫嘉績傳言起兵于閏月初九日蓋自餘姚發也錢肅樂傳言起兵于十二日蓋自鄞發也迎魯王監國當在起兵以後今据全氏月日書之

庚子明兵部侍郎左懋第就刑于

京師懋第在館聞南都亡慟哭其從弟懋泰先爲刑部員外郎降賊後歸于我授官矣來謁懋第懋第曰此非吾弟也叱出之至是不屈與從行兵部司務陳用極游

擊王一斌都司張良佐劉統王廷佐俱以不降死之

致興

明史懋第本傳書其被殺于十二日證之釋史南畧諸書言懋第初館太醫院以勸降不從乃于是月十九日下之獄攝政王復勸之降不從次日死西市

疑明史十二日字倒誤也今据野史日分

丁未故

明唐王聿鍵稱號于福州建元隆武改福州爲天興府以天興建甯延平興化四府爲上游汀州邵武漳州泉州爲下游各設撫按進鄭芝龍鄭鴻逵皆爲侯鄭芝豹鄭彩皆爲伯賜芝龍子森國姓名成功森乃芝龍娶倭婦所生子也以黃道周爲大學士蘇觀生學士張肯堂兵部尙書尋遷吏部召前戶部侍郎何楷爲戶部尙書故太僕少卿郭維經爲吏部侍郎餘拜官有差 自六

月至閏月

大兵連下蘇常克嘉興于是紹興諸郡亦多望風納款
明遺臣之殉難者故大學士高宏圖流寓會稽逃野寺
中絕粒死故左都御史劉宗周以與馬阮不合退居山
陰聞杭州破卽慟哭不食時山陰已歸附門人張應燈
曰此非先生死所也卽日移居郭外有勸以文謝故事
者宗周曰北都之變可以死可以無死以尙有望于中
興也南都之變主上自弃其社稷尙曰可以死可以無
死以俟繼起有人也今吾越又降矣老臣不死尙何待
乎若曰身不在位不當與城爲存亡獨不當與土爲存

亾乎出辭祖墓舟過西洋港躍入水中水淺不得死舟人扶出之凡絕粒二十三日以閏月八日卒故應天巡撫右僉都御史祁彪佳聞杭州失守亦絕粒以閏月四日卒故詹事府少詹事徐汧聞蘇州不守慨然太息作書戒其子舉人枋投虎邱新塘橋下死閏月十一日也汧之死郡人赴哭者數千人時忽有一人儒冠襦衫而來躍入虎邱劍池中土人憐而葬之卒不知其何人也嘉興之拒守也故明翰林屠象美率兵禦于三塔灣大敗象美死之吏部郎中錢棣大學士升子也復集眾拒大兵于震澤眾潰亦死之

攷異野史記同時死者前薊遼守備項嘉謨與二子一妾

俱投水死諸生張初錢應金皆以不屈死又生員鄭宗
彙宗埒俱戰沒又南雷文豹錢棟之同宗錢澄之之妻
方氏抱幼時故吏部尚書徐石麒居嘉興郡城外城將
女投水死破石麒曰吾大臣也城以與亡復入居城中朝服自經
死閏月二十六日也宗周之死舉人祝淵諸生王毓著
皆門人也方宗周絕粒未死毓著上書曰願先生早自
裁毋爲王炎午所弔毓著之友勸以陶淵明故事荅曰
不然吾輩聲色中人久則難持及今早死爲愈召故交
奏樂歡飲罷攜燈出門投柳橋下先宗周一月死淵方
葬母趣竣工既葬還家設祭卽投綬卒踰二日宗周始
卒一時布衣之死事者有山陰潘集周卜年等皆繼毓

著等殉焉

攷異杭州之失在六月其殉難之大臣如劉宗周之等皆在閏月明史各傳皆著其月日以表異之今茲系之閏月下而仍著其日分焉潘集月

卜年之死明史彙記于朱大典傳中而南畧所載言集

問毓著死為文哭之出東門半里許袖二石渡東橋下

自沈死卜年間王毓著潘集俱死肅衣冠超出自磯上

躍入海中死時閏六月初六日也据此則二人之死乃

在劉宗周殉節之前後若朱大典則明年殉難于金華

者也今分書之又潘集亦山陰人見全氏子劉子配享碑

是月左夢庚降于我

大清執江督袁繼咸安撫張亮北去時諸鎮多納款繼

咸勸夢庚旋師不聽己夢庚遣郝效忠紿繼咸赴其軍

將及湖口夢庚效忠降遂執繼咸以行明年三月不屈

死繼咸被脅去猶遺書于部將鄧林奇注碩畫毋為不

忠事至是繼咸北行林奇死之後碩畫亦殉節死

攷異夢庚

之降据二臣傳在閏六月東華錄豫王所奏亦在是月今從之亮在途赴水死見上

故明僉都

御史金聲起兵于徽州先是我

大清破南京列郡望風迎降聲糾集士民保績溪黃山分兵扼六嶽時徽州知府秦祖襄及僚屬皆遁推官溫璜嘆曰城無主民且自相屠乃盡攝其印會聲起義師璜與相犄角且轉餉給其軍于是前山東巡撫邱祖德職方郎中尹民興故副貢吳應箕皆起兵于甯國池州應之聲乃遣使通表唐王授聲右都御史兼兵部侍郎總督諸道軍務以應箕爲監紀推官是夏闖賊李自成兵敗走死通山初自成敗走襄陽我

大清兵兩道追躡蹙之于鄧州承天德安武昌等處窮
追至賊巢連破走之當是時左良玉東下武昌虛無人
自成屯五十餘日賊衆尙五十餘萬改江夏曰瑞符縣
湖廣糧儲參議王喬棟死之

攷異喬棟時駐興國州城城陷死

自成尋

爲我兵所追部衆多降或逃散自成走咸甯蒲圻至通
城竄于九宮山已而自成留李過守寨自率二十騎掠
食山中爲村民所困不能脫遂縊死或曰村民方築堡
見賊少爭前擊之人馬俱陷泥淖中自成腦中粗死剥
其衣得龍衣金印眇一目村民乃大驚謂爲自成也我
兵遣識自成者驗其尸朽莫辨獲其兩從父僞趙侯僞

襄南侯及自成二妾金印一又獲僞汝侯劉宗敏僞總
兵左光先僞軍師宋獻策于是斬自成從父及宗敏于
軍牛金星宋企郊等皆遁亡自成兄子過改名錦偕諸
賊帥奉自成妻高氏降于明總督何騰蛟攷異閩賊之
死無月日明
史流賊傳以爲九月疑掘野史騰蛟奏閩之月分而東
華錄聖武記載豫王奏自成之死在閏六月則其事必
在六月以前綏寇紀畧以爲四月事者亦傳聞之語然
陞非九月則可證也通城通山皆在武昌府之西南明
史言至通城竄九宮山不言至通城之九宮山而諸王
傳則直云走死通山尤得之蓋九宮山實隸通山爲通
城之交界非明史之誤故東華錄亦注
云山在武昌府通山縣南九十里是也 秋七月癸丑
大兵攻嘉定克之明故左通政侯峒曾進士黃淳耀等
死焉峒曾故給事中震陽子也嘉定拒守推峒曾爲主

高耀佐之與同里舉人張錫眉故秀水教諭董用圖諸
生馬元調唐全昌夏雲蛟誓死守城我軍大至峒曾乞
師于吳淞總兵吳志葵志葵遣游擊蔡祥以七百人來
赴一戰失利束甲遁外援遂絕城中矢石俱盡先一日
大雨城崩駕巨木支之是日雨益甚城大崩

大兵入峒曾拜家庶挈二子元演元潔竝沈于池錫眉

用圖元調全昌雲蛟皆死之

致異此据明史侯峒曾傳而嘉定屠城紀畧董用圖

董作龔又用圖兄用廣弟用厚皆諸生兄弟三人同殉云又有縉紳李廉貢生王雲程而鄉兵之敗邑中孫小溪守南橋被殺諸生朱衷恂以留髮故梟首東門諸生婁復聞被縛竝其妻子及姊及外甥悉斬首又吳志葵所遣之游擊蔡喬戰沒東關有徐福者奮力往救與喬俱死未知與蔡祥一人二人否又城未破之先有諸生

唐培率鄉兵巷戰死諸生朱霞被數創號呼竟日死諸
生唐景耀大書白牌諭李成棟降被磔死成棟卽降將
導也並討識之 高耀偕弟諸生淵耀入僧舍將自盡
僧曰公未服官可無死高耀曰城已與已豈以出處貳
心乃索筆書曰宏光元年七月初四日進士黃滔耀自
裁城西僧舍嗚呼進不能宣力王朝退不能潔身自隱
讀書寡益學道無成耿耿不寐此心而已遂與淵耀對
縊死廣興明史黃滔耀本傳以七月二十四日自裁然
諸書皆作初四日卽癸丑也嘉定屠城紀畧亦書
之初四日疑明史誤也滔耀走城西僧舍去城咫尺
會旣死大兵入城主城守者次卽滔耀豈能待至
二十日之久仍聽其自縊僧舍耶蓋卽以峒曾死之日
自縊也又屠城紀畧滔耀有僚婿諸生徐文蔚亦以領
鄉兵與執旂之杭文若俱死之又言嘉定旣下明
把總吳之蕃謀起兵復城不克被殺並討識于此 庚

申明魯王大學士張國維等會師于西興先是魯王至
紹興卽監國位以國維爲太傅兵部尙書武英殿大學
士督師江上畫錢塘而守熊汝霖孫嘉績錢肅樂並右
僉都御史分防江上時總兵方國安自金華至總兵王
之仁自定海至明故文臣沈宸荃馮元勳武臣黃斌卿
張名振皆起義師爲聲援而故總兵張鵬翼會稽諸生
鄭遵謙亦倡衆應焉乃封國安荊國公之仁鵬翼遵謙
皆爲伯尋定分地分餉之議以國安兵最多之仁次之
乃以爲正兵取甯波紹興台州三郡田賦以給而義兵
取于富室之樂輸者謂之義餉未幾正兵並取義餉而

肅樂等軍恒缺食國維督兵連復富陽於潛樹木城于緣江要害聯絡諸營爲持久計 辛未明唐王大學士黃道周出師江西道周學行王雅重之時召故相何吾騶蔣德璟未至道周遂爲首輔而鄭芝龍鴻逵兄弟橫甚王一日召宴芝龍以侯爵欲位道周上衆議抑之由是文武大不睦有諸生上書誅道周迂不可居相位王知出芝龍意下督學御史撻之王將郊天芝龍稱疾不出何楷劾其不陪祀無人臣禮王獎其風節命掌都察院事芝龍不懌又屢薦其私人爲清要官王皆不從以是益懷怨望會

大清遣御史黃熙允招撫福建熙允與芝龍同里芝龍
密使通欵王屢趣出兵輒以餉絀辭道周知芝龍無意
出關乃自請募兵江西號召羣帥王給空劄百道至是
啟行僅齎一月糧以虛聲鼓動得卒九千餘人從廣信
出衢州道周所至撫輯遺黎聯絡聲勢遠近頗響應攻
道周以是年之七月出師江西見明史本傳釋史系之
辛未輯覽目中所云二十二日者是也廣信之下在明
年道周被執之後輯覽書于
七月蓋月克江西彙記耳 是月

大清兵克建昌明江西布政使夏萬亨等死之先是
大兵取南昌連下袁州臨江吉安等郡遂攻建昌萬亨
以南昌失守避居建昌副使王養正時分巡建昌遂與

萬亨及知府王域推官劉允浩南昌推官史夏隆起兵拒守會明益王由本在建昌推奉之閏三日有客兵內應城卽破由本奔走歸唐王于福州萬亨養正等械至南昌俱被殺養正妻張氏聞之亦絕粒九日死萬亨妻顧子婦陸及一孫一孫女先赴井死僕婢死者復十餘人時守臣同死者六人其一人失其姓名攷異明史本姓名蓋據溫氏釋史也有以爲建昌通判胡縝者茲詳後鄱州之役下建昌人哀其忠哀而痊之表曰六君子之墓初建昌南城諸生有鄧思銘者聞北都陷集其儕數十爲庠兵期朔望習射學技擊爲國復仇請于有司有司笑曰庠可兵邪衆志遂懈思

銘尋鬱鬱不得志至是城破亦死之

大兵既取吉安遂長驅至萬安是時江西列郡皆下惟
贛州孤懸上游兵力單寡會故明益府永甯王慈炎招
降峒賊張安時號龍武新軍者也遣復撫州南贛巡撫
李永茂命副將徐必達扼泰和戰敗至是

大兵至萬安遇永茂永茂遂奔贛有叛將白之裔者初
偕守將鄧武泰扼峽江我軍至武泰死之之裔降遂導
大兵入萬安江西巡撫曠昭被執死萬安知縣梁于渌
亦死之攷異明史萬元吉傳八月破萬安證之釋史言
于渌繫獄五十有三日以九月十三日自縊死
據此則萬安之下亦在七月江西通同時又有袁州同
志亦書于是年七月之下今從之

知李時興攝府事會城已降時興力城守無何守將浦
纓兵潰湖廣援將黃朝宣五營亦譟歸時興度不能守
自縊于萍鄉官舍一僕殉焉

大清兵克崑山明貢生朱集璜等死之集璜學行素爲
鄉里所推教授弟子數百人南京旣亡崑山議拒守而
縣丞閻茂才已遣使迎降縣人共執殺茂才以六月望
推舊將王佐才爲帥集璜及故儀封知縣周室瑜諸生
陶琰陳大任等共舉兵參將陳宏勛前知縣楊永言帥
壯士百人爲助佐才亦邑人嘗官狼山副總兵年老矣
大兵至宏勛率舟師迎戰敗還游擊孫志尹戰沒城陷

永言遁去佐才縱民出走而已冠帶坐帥府被殺集瑣
投東禪寺後河死門人孫道民張謙同日死室瑜琰大
任亦死之室瑜子朝鑛大任子思翰皆殉焉時以守禦
死者蘇達道莊萬程陸世鏗陸雲將歸之甲周復培陸
彥冲代父死者沈徵憲朱國軾救母死者徐洛自盡者
徐澂王在中吳行貞云夜畧事見明史本傳諸書皆系
之閏六月惟南畧書崑山城破
于七月初六日三藩紀事作初七日輯覽敘其事于八
月破松江目中注云是年七月事今系之七月下而南
畧所記又有故將王揚年七十奮勇力戰死未知卽王
佐才否詳其上下文則與佐才爲二人而釋史所載室
瑜妻諸被執不辱死之朝鑛妻王亦自縊大任
妻張氏亦赴水死陶琰琰作瑛玳玳識于此 永言之
起兵于崑山也辟崑山諸生顧炎武佐軍炎武遂偕嘉

定諸生吳其沆及歸莊共起兵魯王監國授炎武兵部
司務及崑山下永言遁去其沆死之炎武與莊得脫歸
是夏炎武母守貞王氏避兵常熟之郊以曾受旌于明
語炎武曰我雖婦人然受國恩矣果有大故我則死之
至是遂絕粒卒

大兵之下蘇常諸郡也諸以義兵拒守及不屈而死者
蘇州旣降諸生陸世鏞聚眾焚城樓福山副總兵魯之
璵率千人赴之入城戰敗世鏞等走之璵戰死致異而
韋武韜與之太倉已下諸生王湛與兄瀆集里中人數
璵同戰死百圍城城中兵出瀆赴水死湛被斫死宜興故中書舍

人盧象觀前督師象昇弟也奉明瑞昌王盛瀝起兵謀

復宜興不克從弟諸生象同及其部將陳安殉節錄一作坦公

陣沒安連殺七人據橋力戰兵潰被磔死象觀赴水死

弟諸生象晉爲僧一門先後赴難者百餘人長洲諸生

顧所受作捲堂文投泮池死吳興列節錄有顧咸受崑山諸生城破死而無所受

名未知是一人常熟諸生徐守質以母病不忍避兵至

母及妹投井死守質與里人馮知十出門格鬥死汝異二人

同時死見殉節錄南畝言守質之叔同里貢生項志甯

徐憐先自縊死而錄中不具知識之同里貢生項志甯

亦絕吭死無錫諸生嚴紹賢與妾張氏相對經死常州

諸生張龍文無錫諸生王謀皆以謀起兵事敗被執死

攷異乙酉

大兵之至招殉節錄所載職官有常熟

知縣王鐵與孫道煥同殉入祠士民中有呂雲奇太倉

人城破救父被殺吳江周南都之也故明吏部員外

瑞與吳易舉兵被獲死之

郎華允誠屏居墓田越三年戊子以不薙髮爲鄉人所

訐執至江甯不屈賦絕命詞與其從孫尙濂同日駢斬

于市僕薛成宋孝殉焉 八月壬午

大清兵克松江先是明故兵部右侍郎兩廣總督沈猶

龍偕中書舍人李待問羅源知縣章簡等募壯士數千

人守城會吳淞總兵吳志葵自海入江結水寨于泖湖

總兵黃蜚擁千艘自無錫至猶龍等聯絡二帥而明故

參將侯承祖守金山衛遙相應援及

大兵克嘉定進取松江志葵蜚敗于春申浦城遂被圍
至是破猶龍出走中矢死待問守東門簡守南門城破
俱被殺華亭教諭睦明永題詩明倫堂投綬死諸生戴
泓赴池死嘉定舉人傅凝之參志葵軍事兵敗赴水死
攷異據釋史所載尚寶司丞徐念祖及妻張二妾陸李
俱投綬死明史沈猶龍傳不載又有衣工陸厚元積薪
與妻子女皆焚死並識之又
念祖殉松江並載殉節錄

大兵遂攻金山承祖與子世祿猶固守城破承祖巷戰
被獲說之降曰吾家食祿二百人十年今日不當以死

報國邪遂僇之世祿中四十矢亦被獲不屈死

攷異明史松江

破在八月釋史八月初旬而南畧及平吳紀畧三藩紀
事皆書八月初三日今據之蓋在下嘉定之後破江陰

之前
也 庚寅故明唐王命總兵黃斌卿出鎮舟山 庚子

大清兵克江陰與史閻應元陳明遇等拒守兩月餘及
松江破吳志葵黃蜚皆被執至江陰城下令說城中人
降志葵說之蜚不語應元等屹不爲動我兵來益衆四
圍發大礮城中死傷無算猶自守至是

大兵從祥符寺後城入衆猶巷戰男婦投池井皆滿明
遇及諸生許用皆舉家自焚應元赴水被曳出斬之訓
導馮厚敦冠帶縊于明倫堂姊及妻王結衽投井死 異
據殉節錄又有江陰訓導潘文先罷官居城中 里居中
城破與馮厚敦俱死之諸書皆不見附識之

書舍人戚勲令妻侯妾程葉梁及子女子婦先縊乃舉
火自焚從死者二十人舉人夏維新諸生王華呂九韶
自刎死貢生黃毓祺與門人徐趨舉兵行塘以應城內
兵及城陷皆逸去毓祺避江北其子大湛大洪被收兄
弟方爭死而毓祺以敕印事發逮繫江甯獄將刑其門
人告之期命取襲衣自斂趺坐而逝攷異據南畧又有
稱周相公與毓祺俱解至南京殺之薛生者改
失其名其父監生名繼周皆同時起義者趨以明年冬
偵江陰無備率壯士十四人襲之不克亦死焉同時顧
端文之孫杲亦以援兵敗于砂山而沒凡城守八十一
日城中死者九萬七千餘人城外死者七萬五千餘人

攷吳明史閻應元傳言江陰以八月二十一日
兵從祥符寺後城入陷之輔賢亦系之目與江陰城
守記合記中言應元赴水義民陸正先救之出應元既
誅正先亦殉焉條皆與本傳同顧杲據釋史以援江上
師過江陰之砂山爲亂兵所害以非援
江陰故江陰城守記不載今彙記之
是月明唐王

以故輔黃景昉尙書呂大器及故漕運總督路振飛禮
部侍郎朱繼祚工部侍郎曾櫻俱爲大學士初王以罪
錮高牆振飛保護之捕治守陵中官之凌虐者又以私
錢助王而上疏乞槩寬罪宗竟得請王甚德之及稱號
卽拜振飛左都御史尋赴召道拜文淵閣大學士櫻嘗
爲福建參政力保鄭芝龍芝龍感之遂薦焉起爲工部
尙書兼東閣大學士無何命掌吏部而移張肯堂于都

察院王所置閣臣至多前後幾三十人然不令票旨王
率親爲之時鄭芝龍爲政議簡戰守兵自仙霞關外宜
守者一百七十處計兵十萬戰兵如之閩浙兩粵之餉
不足支其半乃請預借兩稅一年令臣下捐俸勸紳士
輸助徵府縣銀穀未解者官吏督迫閭里騷然 明魯
王將方國安王之仁謀自富陽渡江

大兵迎擊斬首四千級復退據富陽初王之監國也故
分巡甯紹台道于潁與鄭遵謙謀起兵潁請畫江而守
一軍扼潭頭一軍扼橋司一軍扼海門一軍扼七條沙
會

大軍突至復入富陽部將劉義勳等死之潁自漁浦渡

江赴援富陽復定

攷吳富陽之扼江而守明史以爲張國維證之全氏于公事畧實始于潁

且謂方國安之駐七條沙

大兵所以不克遽渡者

潁之取富陽其首功也今追記之而江干之役八月一

戰十月再戰輯覽彙書于見年之八月蓋大兵入

富陽江干軍始敗時也潁以明年六月江干之敗由海道還京口爲黃冠以

終並見全氏本傳中

故明靖江王亨嘉守謙十世孫

也世居桂林聞南京破招集諸蠻起兵自稱監國謀僭

號時廣西巡撫瞿式耜甫抵梧州亨嘉召之不往而檄

思恩參將陳邦傳助防止蠻兵勿應亨嘉至梧州式耜

幽之桂林遣人取其敕印初式耜議立桂王常瀛子聞

唐王監國以爲倫序不當立不奉表勸進至是爲亨嘉

所囚乃遣使賀唐王因乞援王喜而亨嘉爲兩廣總督
丁魁楚所攻勢窘乃釋式耜式耜與中軍官焦璉召邢
傳共執亨嘉械送福州廢爲庶人尋殺之唐王封魁楚
平粵伯留填兩廣擢式耜兵部右侍郎召入閩協理戎
政以晏日曙代撫廣西式耜不入閩退居廣東 南都
之陷也明故巡撫楊文驄敗于京口遂走蘇州時

大清遣鴻臚丞黃家鼐往蘇安撫文驄襲殺之遂走處
州唐王在鎮江時與文驄交好至是文驄遣使奉表稱
賀鄭鴻達又數薦之乃拜兵部右侍郎兼右僉都御史
提督軍務令圖南京而是時馬士英擁殘兵渡江欲謁

魯王王之諸臣力拒之乃投總兵方國安軍謀窺杭州
大兵之下吳江也明在籍職方主事吳易走太湖與同
邑舉人孫兆奎諸生沈自炯自炳武進吳福之等謀舉
兵旬日得千餘人屯于長白蕩出沒旁近諸縣道路爲
梗唐王聞之授易兵部右侍郎加右僉都御史總督江
南諸軍楊文聰奏易斬獲功多進兵部尙書魯王監國
亦授易兵部尙書封長興伯

以上據明史
卷七月事

至是

大兵至易遂敗走父承緒妻沈及女皆投水死自駟自
炳福之亦死焉兆奎被獲一軍盡殲福之魯王禮部尙
書吳鍾巒子也兆奎兵敗福之慮易妻女被辱視其死

而後行故被獲械至江甯殺之

攷異南畧言福之約任源遠同就總兵某兵敗

源遂投湖死又武進徐安遠從黃蜚兵敗亦死之

大兵之下松江也明故吏部考功司主事夏允彝死之

初允彝與同邑陳子龍皆負重名南都立召允彝授職

疏請終制不赴時御史徐復陽希要人指劾允彝及其

同官文德翼居喪授職爲非制以兩人皆東林也兩人

實未嘗赴官無可罪吏部尙書張捷遽議貶秩調用未

幾南都失允彝傍皇山澤間欲有爲閩友人侯峒曾黃

澂耀徐汧等皆死乃以是月中賦絕命詞自投深淵以

死攷異明史本傳允彝以是年八月中賦絕命詞死證之陳子龍年譜注中作九月又載宋徵輿私謚說言

允美八月自沈于淵則明史固有所據松子龍念祖母江以八月三日陷所謂八月中者尤得之年九十不忍割道爲僧踰二年亦以謀起兵敗

大清兵之下撫州也明在籍吏部考功主事揭重熙謀復之與同邑故吏部文選主事曾亨應先後起兵亨應聞列城皆不守命弟和應奉父入閩而已與重熙及東鄉舉人艾南英謀城守會永甯王慈炎招峒兵復建昌人撫州寓書亨應而重熙亦奉唐王命以故官聯絡建昌兵比戰而敗亨應方募兵數百相犄角一日方置酒宴客

大兵至亨應避石室其從弟指示之遂被執並執其長

子筠亨應顧謂筠曰勉之一日千秋毋自負筠唯唯先受刑死釋亨應縛諭之降不荅被僇總兵謝上達副將王坤參將賴明標游擊蕭莫邦都司汪一貴守備杜有聲都督蔡欽金世任副將林引等俱見執死和應聞兄死曰烈哉兄爲忠臣子爲孝子復何憾旣奉父入閩又走避之肇慶乃拜辭其父投井死先是亨應叔父杕爲蒲圻知縣其後杕兄益爲貴州僉事並死難人稱會氏五節云重熙被劾明唐王用大學士曾櫻薦命以考功員外郎兼兵科給事中從大學士傅冠辦湖東兵事久之亦敗南英入閩唐王召見陳十可憂疏授兵部主事

尋改御史明年八月卒于延平 九月甲寅

大清豫親王多鐸以故明福王由崧歸于京師明年五月卒閩中浙東皆遙上尊號云 庚午故明御史黃澍降于

大清澍徽人與右都御史金聲同里遂導

大兵間道襲績溪破之聲被執械送江甯壬申

大兵入徽郡澍復以城獻明推官溫璜時寄其帑于村舍聞難將拔刀自刎既念家屬必不保乃趨歸語妻茅同死先刃其長女茅攜幼子同整衣卧璜以刀截其喉少頃茅呼曰未也再刃而絕璜自刎不殊絕粒五日以

手自抉其創而死璜爲故大學士溫體仁之族弟體仁當國附之者如驚璜獨夷然自守反與東林諸君結契名在復社第一集年近六十始成進士出給事中吳甘

來門下釋褐得是官甫之任而國難作至是遂闔門殉

之致黑金聲兵敗被執事見明史本傳書于九月之下

之句諸書或云二十日或云二十二日按

大兵以

二十四日壬申破徽州見溫氏釋史績溪去郡百餘里況我兵是時由甯國踰嶺分道而入則以爲二十二日者正與本傳下句之語合璜爲啗園之世父其死也啗園之父迎其喪故記其殉難月日甚詳而獨于不附體仁事畧之蓋爲家族諱也

明金聲之起兵也故山東

今參鮑埼亭推官傳書之

巡撫邱祖德成都人時成都已陷無家可歸以曾爲甯

國推官遂流寓焉至是偕邑舉人錢文龍諸生麻三衡

沈壽蕤等共舉兵以應聲及

大兵下甯國祖德駐華陽三衡駐稽亭約他部共攻郡城不克壽蕤陣沒祖德退還山中我軍攻拔其寨被獲礮死其子亦死越四日三衡軍敗亦死三衡之起旁近吳太平阮恒阮善長劉鼎甲胡天球馮百家與之俱時號七家軍皆諸生也三衡旣敗太平等亦死是月故明湖廣總督何騰蛟撫降闖賊餘黨得勝兵數十萬初自成之死其將劉體仁郝搖旗以衆無主議歸騰蛟率四五萬人驟入湘陰長沙人不知其歸降也懼甚攝偏沅巡撫傅上瑞請騰蛟出避騰蛟曰死于左死于賊一

也何避爲乃與監軍荆西道僉事章曠謀遣部將萬大鵬等往撫持騰蛟手書召之曰若輩歸朝誓永保富貴搖旗等大喜與大鵬至長沙騰蛟開誠拊慰宴飲盡歡搖旗招其黨袁宗第蘭養成王進才牛有勇皆歸騰蛟驟增兵十餘萬未幾李錦偕自成妻高氏見上及高氏弟一功復擁衆三十萬驟至澧州乞降故明湖南巡撫堵允錫議撫之會騰蛟馳檄至允錫乃躬入其營開誠樹諭稱詔犒軍皆踊躍拜謝奏聞唐王王大喜加允錫爲兵部右侍郎兼右僉都御史總制其軍授錦前部左軍改名赤心一功右軍改名必正皆掛將軍印封高氏貞

義夫人名其營曰忠貞營自成亂天下二十年陷帝都
覆廟社其衆尙數十萬悉歸騰蛟一時詫異事而騰蛟
上書但言元凶已除稍洩神人憤宜告謝郊廟卒不言
己功王猶疑自成死不實騰蛟復上書證其事乃拜騰
蛟東閣大學士兼兵部尙書封定興伯仍督師騰蛟固
辭封爵不允命規取湖廣江西是時降卒旣衆騰蛟欲
以舊軍參之乃題授部將黃朝宣張先璧爲總兵官與
劉承允李赤心郝永忠表宗第王進才及董英馬進忠
馬士秀曹志建王允成盧鼎並開鎮湖南北所謂十三
鎮者也永忠卽搖旗英則騰蛟中軍志建則故巡按劉

熙祚中軍餘皆左良玉舊將也然騰蛟終慮赤心敗厄
他日過其營請見高氏再拜執禮恭高氏悅戒其子毋
忘何公赤心自是無異志允錫亦深相結倚以自強然
赤心書疏猶稱自成先帝高氏太后云 江西之下也
惟贛州獨存明唐王手書加故左庶子楊廷麟爲吏部
右侍郎修撰劉同升爲國子祭酒同升自粵都至贛與
廷麟謀大舉乃偕巡撫李永茂集紳士于明倫堂會
大兵屯泰和徐必達戰敗事見上廷麟同升乘虛復吉安
臨江王再加廷麟兵部尙書兼東閣大學士賜劍便宜
從事未幾復擢故監軍萬元吉兵部右侍郎兼右副都

御史總督江西湖廣諸軍尋召永茂還以張朝綬代爲
南嶺巡撫朝綬甫任事復召還以同升代之 明魯王
授故明諸生黃宗羲爲職方主事孫嘉績等之起師江
上也宗羲糾黃竹浦子弟數百人應之江上人呼曰世
忠營尋條姚知縣王正中以宗羲所作監國魯元年大
統歷上之王命宣付史館頒行改異宗羲從軍當在七月孫熊諸公起師之後
其上魯元年監國歷諸書及全氏集皆系之是年九月今据之時又徵湘潭舉人郭金
臺甬化諸生李世熊皆不赴 是秋福建土寇閩羅宋

三姓擾及江西之撫州東湖守備黃克嘉死之別賊擾

南康通判吳賜玉死之改異克嘉一作善賜玉賜一作錫今據殉節錄書之是秋則

據釋史也又殉節錄有南康典史
宋本忠殉難未詳何時增識之

冬十月丙戌明魯

王大學士張國維等出師于江上時總兵方國安駐七
條沙王之仁守西興鄭遵謙守小鹽孫嘉績熊汝霖錢
肅樂分守滙海至是謀復攻杭州連戰十日前鋒副將
鍾鼎新以火攻會諸將追截

大清兵于草橋門會大風雨弓矢不能發而退

大兵迎擊敗之于關頭追奔二十餘里斬國安于士衍
是時浙西義旗四起蘇松嘉湖列營數百里相爲聲援
杭州危甚錢肅樂請率兵由海道窺吳不聽遂及于敗
攷異釋史言出師于初八日與全氏錢忠介傳合而以
初八日爲壬辰則誤也是月己卯朔初八日爲丙戌而

王辰則傳中所謂第七戰者也。是日以大風雨退師。又二日遂敗。則自丙戌至是爲乙未也。今據全氏傳系之初八日。蓋出師之始。而輯覽統系之八月者。蓋括諸軍進次富陽月分耳。丙申明唐王右

都御史金聲被執至江甯門。人江天一從焉。聲語天一

曰：子有老母，不可死。對曰：天一從公起兵，可不同公殉

義乎？時總督洪承疇招撫江南，在江甯諭之降。天一朗

誦明莊烈諭祭承疇文，譙之遂與聲同受刑于通濟門。

部下中軍吳國楨副將陳有功守備萬全游擊余元寅

皆死之。總兵范雲龍與聲之弟經尋死于旌德。改異從死諸將

皆據輯覽書之。釋史所記同死者天一外有陳際遇、余

元英、疑元英卽元寅也。同起兵者歙諸生項遠、洪士魁

副將羅騰蛟、都司汪以玉先後被執不屈死。而天一族孫孟卿亦從死。均識之。是月明唐王

遣給事中劉中藻頒詔于浙東時求富貴者爭欲應之
兵部侍郎熊汝霖獨出檄嚴拒不納杭州之降故兵部
尙書朱大典還金華據郡城自保唐王立就加東閣大
學士會魯王監國于浙東亦加大典大學士閩中詔至
大典及右副都御史錢肅樂議以大敵在前而同姓先
爭豈能成中興之業請權宜稱皇太姪以報命大學士
張國維復馳疏爭之畧言國當大變凡爲高皇帝子孫
臣庶所宜同心併力共圖興復成功之後入關者王且
監國當人心渙散之日鳩集爲勞一旦南拜正朔鞭長
不及悔莫可追臣老矣豈能朝秦暮楚左右于其間哉

遂不報唐王乃召中藻還自是浙閩如水火矣

攷異明史朱大

典傳不載爭願詔一事且言大典就唐王督師不及魯王而野史皆言魯王亦加大典大學士又證之全氏朱大典錢肅樂諸人傳是時閩中詔至大典與肅樂議受而報之掘此則大典是時固周旋于唐魯間也今据全集

明唐王故元妃曾氏至福州妃知書性警敏同王

在高牆中食淡攻苦相憐愛王之稱號也遙冊妃爲皇后竝封其父文彥爲伯至是妃自浙至頗預國政羣臣奏事輒于屏後聽之共決進止王頗嚴憚焉大學士張肯堂疏言本朝高文二后皆有聖善之德助成王業然皆宮闈之中嘿爲贊助若垂簾之制非盛世所宜不可以示遠人疏入妃恚之自是頗疏肯堂王在莊烈時有

英察之稱及是內溺曾妃外牽鄭氏識者已知其不能
成大功也路振飛之至也王大喜與宴抵夜分撤燭送
歸解玉帶賜之王嘗責諸臣怠玩振飛進日上謂臣僚
不改因循必至敗亡臣謂上不改操切亦未必能中興
也上有愛民之心而未見愛民之政有聽言之明而未
收聽言之效喜怒輕發號令數更見羣臣庸下而過于
督責因博覽書史而務求明備凡上所自謂長者皆臣
下所甚憂也其言頗曲中王短云政異晉妃之至諸書多系之入月王辰惟
南畧以爲十月迎入官而入月之立乃遙明唐王掌
冊也輯覽亦載如至福州于十月今從之都察院事何楷罷鄭芝龍以被劾銜楷而鴻達扇殿上

楷呵止之兩人益怒楷知不爲所容乃請去途中遇盜截其一耳則芝龍使部將楊耿爲之也明年漳州破楷遂抑鬱而卒

大兵攻吉安明副將徐必達戰敗赴水死會廣東援兵至

大兵退屯峽江克臨江明楊廷麟兵敗于樟樹鎮退守吉安十一月明唐王始議出師時楊廷麟等請王出江右何騰蛟請出湖南浙中諸將請出衢州會故臨清知州金堡朝行在言騰蛟足倚急于是王欲出贛入楚大學士蘇觀生見鄭氏不足與有爲且事權悉爲所握

請出贛州經畧江西湖廣王遣觀生先行赴贛州募兵
以曾櫻鄭芝龍留守福州司轉餉王乃誓師西郊先期
類于上帝禋于太廟禡于社稷以鄭鴻逵爲御營左先
鋒出浙江鄭彩爲御營右先鋒出江西王甲冑誓師乃
鳴金鼓揚旌旗而出時風雨晦冥大風起壇上燭盡滅
鴻逵出城馬蹶踣地識者已知其不祥也夜異釋史書十一月甲午
類于上帝乙未禋于太廟丙申禡于社稷丁酉以鄭鴻
逵爲先鋒以厯推之皆十月干支然王十二月始發福
州則誓師當在前月蓋誤以十月干支入明魯王駐
之也今摺輯覽系之十二月前而不書日
師西興仍拜方國安爲帥以圖再舉敘草橋功加錢肅
樂右副都御史肅樂辭不受時以頒詔議不合爲方王

所忌乃以不受副都之命爲懷貳心于閩肅樂不得已乃受官而餉乏四十日連疏告糴不能得諸軍士至行乞于道卒無叛者是時故太僕卿陳潛夫以家財募軍列營江上及財竭請支四百金之餉肅樂言潛夫破家爲國今聽其軍之餓死而不恤何以鼓各營復爲潛夫請皆不應戚臣張國俊魯王妃父也外倚方王內通客李二奄肅樂疏言國有十亡而無一存民有十死而無一生剋車四出無一應命一也憲臣劉宗周之死關係甚巨謚贈蔭恤未協輿情勅部改正遲久未上二也張國俊以戚畹倚強藩權侔人主三也諸臣以國俊故相

繼進言主上以爲不必幾于防口四也新進鼓舌搖唇
罔識體統五也反覆之徒借推戴以呈身觀望之徒冒
薦舉而入幕六也楚藩江干開詔欲息同姓之爭李長
祥面加斥辱凌蔑至此七也咫尺江波烽煙不息而裒
衣博帶滿目太平燕笑漏舟之中廻翔焚棟之下八也
所與托國者強半宏光故臣鴟音不改九也此猶枝葉
也請言根本七月雨水不時漂廬舍以千百以水死洊
潮衝入西成失望以饑死壯者殞鋒鏑弱者疲轉輸以
戰死絳票赤紙日不暇給以供應死東南澤國倚舟爲
命今士卒爭舟小民束手以無藝死入鄉抄掠雞犬不

遭以財死富民卽曰應輸非有罪於官也而拘繫之有
甘心雉經者以刑死沿門供億淫污橫行以辱死劣矜
惡棍羅織鄉里以爲生涯以憂死今也竭小民之膏血
不足供藩鎮之一吸繼也合藩鎮之兵馬不足衛小民
之一髮凜凜乎將以髮死由前九亡并此而十臣未知
稅駕矣未幾肅樂拜表卽弃軍行言臣從今披薙入山
永與世辭決不入閭以遭殄滅遂之温州王知不可留
乃降旨令往海上同藩鎮黃斌卿議由海道窺三吳遂
依斌卿于翁洲 十二月己卯明雲南土司沙定洲作
亂定洲王弄山長官沙源子源在萬厯中數從征調有

功累加至宣撫使號沙兵源死定洲嗣初崇禎中阿迷
土官普名聲謀叛官兵進討名聲懼陰以賄求援于元
謀土官吾必奎時官軍已調必奎隨征必奎佯敗而走
官軍望見遂大潰布政使周士昌戰死未幾名聲就撫
而驕恣益甚廣西知府張繼孟道出阿迷以計毒殺之
必奎聞名聲死遂反連陷武定祿豐廣通諸縣及楚雄
府明故黔國公沐天波調各土司會勦必奎伏誅先是
天波調定洲兵從征定洲不欲行出怨言會奸徒饒希
之余錫朋者逋天波金無以償錫朋常出入土司家誇
黔府富盛定洲心動陰結都司阮韻嘉諸人爲內應至

是定洲旣至知必奎已平乃託以辭行入城見天波天波以家諱日不視事定洲諫而入焚刼其府天波聞變由小竇遁走楚雄母陳妻焦皆走城北自焚死定洲據黔府盤踞會城時故禮部尙書王錫衮家居祿豐被定洲執至會城詭草錫衮疏上明桂王請以定洲代黔國公填滇錫衮大恨祈死數日卒復刼巡撫吳兆元題請傳檄州縣全滇震動天波至楚雄時金滄副使楊畏知奉調駐城中以計說天波走永昌身守楚雄定洲至城閉不得入乃去遣其黨王翔李日芳等攻陷大理蒙化而楚雄以畏知拒守定洲還攻者再迄不能下時被沙

兵先後死者武定參將高其勲固守月餘城陷衣冠望
北拜服毒死時有陳正者世爲大理衛指揮未嗣職沙
賊陷城督衆巷戰手馘數賊而死王承憲者襲祖職爲
楚雄衛指揮擢游擊爲畏知前鋒定洲來攻凡守禦備
悉畏知深倚之賊去復至承憲偕土官那篤等出城衝
擊賊皆披靡俄爲流矢所中死弟承瑱力戰死一軍盡
歿賊進圍大理時太和縣丞王士傑佐上官畢力捍禦
城陷死城上同死者大理府教授段見錦經歷楊明盛
及子一甲司獄魏崇治而故永昌府同知蕭時顯解任
以道阻寓居大理亦自經士人同死者舉人則高拱極

投池死楊士俊同母妻妹自焚死諸生則尹夢旗夢符
馮大成倡義助守罵賊死楊憲偕妻女子婦姪女孫女
弟婦一門自焚死楊遜既死復甦妻竟死人稱太和節
義爲獨盛云單國祚者會稽人爲通海典史城陷握印
坐堂上罵賊被殺印猶在握縣人葬之諸葛山下攷異沙賊
之役殉節錄所載自大理衛指揮陳楨督衆巷戰手斃
數賊而死卽陳正也又有大理守備陳謫分門守禦殺
賊力屈死甯州土司祿永命守土戰死知州朱家梁罵
賊死都司沐天澤天波之弟巷戰被執不屈死指揮邵
元齡陸涼陷罵賊不屈死昆明故知府陳爰謀城破逼
降不屈死蒙化故巴縣知縣陳于宸城陷死大理千戶
關維翰土官楊洪及維翰子大忠皆以殺賊死大理千
戶楊昌印王象乾鮑洪皆率妻子闔戶自焚死百戶黃
恩巷戰死天波將高遷援勦
不克合戶自焚死附議之

甲申明唐王自福州登

舟大學士何吾騶等隨行越數日駐師建甯故明廣東
布政使湯來賀運餉十萬由海道至王擢來賀戶部侍
郎然兵食匱乏人心離散迄不能成軍也 壬寅明唐
王大學士督師黃道周兵敗于婺源先是道周師至廣
信聞徽州破乃疾趨分道進兵俄聞樂平陷信州士大
夫致書相迓道周以諸軍旣出義不反顧行次婺源遇
大兵戰敗其將程嗣聖陣亡道周僅三百人馬十匹齎
三日糧行次明堂里遇揚州降將張天祿導
大兵猝至遂被執送至江甯諸軍潰走

大兵追至開化總兵曾德黃光輝副將蔡璋龍勝陳辰

等俱死之方道周之出發源也有故汜水知縣胡海定與德興海川董氏起兵應之斷我

大兵糧道兵敗被執海定及董正經皆死之

攷異見三藩紀事本

末及江西通志殉節錄言海定故汜水知縣今據之又同時死者有揭新云

是月明南贛

巡撫劉同升卒時萬元吉已至贛州遂以元吉兼巡撫代之

大清兵克撫州明知府高飛聲死之飛聲由玉山知縣

遷同知乞養家居黃道周出督師邀與偕令攝撫州事

至是遣家人懷印入閩而身守城死焉

攷異殉節錄撫州訓導桂有燧

兵入城自經死按撫州有燧之死無年月附識之

大兵兩克

故明益王之起兵

建昌也故給事中陳泰來奉唐王命加僉都御史提督江西義軍會益王起兵泰來欲從之泰來新昌人同里故按察使漆嘉祉舉人戴國士持不可已而新昌破國士出降泰來惡之時上高舉人曹志明等起義師泰來與相結是月攻取上高新昌甯州殺國士妻子遂取萬載已而

大兵逼新昌守將出降泰來走界埠志明等從上高移師會之進攻撫州兵敗皆死是冬明監紀推官吳應箕兵敗于池州死之應箕起兵應金聲比聲敗被執應箕方治兵于距郡十里之泥灣有怨家偵得之以告

大兵進攻應箕敗走山中尋被執至郡不屈賦絕命詞
從容就僇其受刑處血跡洗之不去觀者異之應箕爲
諸生尙氣節與復社諸生倡逐阮大鍼南都立大鍼柄
用逮周鑣獄中應箕身至江甯視鑣幾被獲亡命歸卒
以國事死歸德侯方域爲文祭之云讀萬卷書識一字
是明三百年獨養此士夜異事見明史本傳釋史南畝
諸書謂死于金聲被執至江甯
之後聲之死在十月則應箕之死又在其後冒氏以爲
乙酉之深冬蓋十一二月間事也今系于是年之冬下